

Lukaq É Gabú Danglù Laiká Mâ É Mhô-myi Pé

Laiká Bùk - V



Bo É Dang-U Pé

Nghap cham	Dang-u	Laiká Myòq
21	Pilat é Hí Má Yesuq Jéyáng Huî É Hkyô	1
22	Tapzîng Htoq Má Yesuq shî hkâm É Hkyô	15
23	Yesuq Dum Dui Toq É Hkyô	33
24	Ema-u gâ é Wà Shut E É Hkyô	45
25	Yesuq Mauhkûng Shut Shuî Toq Yû Huî É Hkyô	63

Illustrations by Sweet Publishing <http://sweetpublishing.com/>

This work is licensed under the Creative Commons Attribution-ShareAlike 3.0 Unported License. To view a copy of this license, visit <http://creativecommons.org/licenses/by-sa/3.0/> or send a letter to Creative Commons, 444 Castro Street, Suite 900, Mountain View, California, 94041, USA.


Scripture passages are from the New English Translation

The introduction and study questions were developed by Michelle Miller and Pang Snta' to be used with an audience of elementary-age children or with new believers who have limited background knowledge of the Scriptures. The goal of the questions is to help people engage with the Bible stories through a discussion format. The questions in this guide may be freely adapted as deemed appropriate for a particular audience.

Title : Luke Shellbook Vol.V
Translator : Chumlut Ban Htang
Lahpai Nang Doi
Chumlut Laq Pa
Editor : ZBTC
Language : Zaiwa
Date : 26th October, 2019
Edition : First Edition

21. Pilat é Hí Má Yesuq Jéyáng Huî É Hkyô

Jesus on Trial before Pilate




Lukaq 23: 1-5, 13-14, 18-24

Dang hpóng


Mhò-myi ahkyo azó shî má, mau zau Pilat é hkyô lé wó sê yù râ nghut lhê. Mau zau Pilat gi, Yudaq mau lé ùp é Romaq zau rayùq nghut ri. Yudaq mau haû gi, Yerusalem wà mó jòq é mau nghut ri.

Hkyang jông pé eq Sûwún wuî gi, Yhûmsîng Yesuq lé mara hûn naù kôhang, mau zau Pilat é ahkâng a wó jáng, haî le a wó kut kó nghut ri. Haû mù, yhángmòq gi, Yhûmsîng Yesuq lé ban jéyáng é htâng, tapzîng wàq nhâng mù sat râ ahkáng lhom byi râ matú, mau zau Pilat é hkóhkâm wàng shut shuî e akô.


Hpyê lhum râ dang myi pé : tarâ a cháng sù lé, haî mù pyá dá dàp a nghut jáng, tarâ rûng má chyup ló akô lú? Hkâsu kut dà m byi é hui zo sê akô lú?



¹ Haú hkûn, zup zîng tô é bang banshoq gi, htoq mù, Yesuq lé mauzau Pilat chyáng shuí wang ê luî,² “Shí yuq gi, mingbyû wui lé hkyô shuí nghoq é eq, hkoséng Kehtaq chyáng kang kat râ hkyô lé le hkûm to luî, Yhânggùng yhang gi, haú Hkrisduq nghû é hko hkâm nghut lhê ga luî, taî nyi é lé ngamoq myang ri.” ga luî, Yhang lé mara hun akô.



³ Haú hkûn, Pilat gi, Yesuq lé, “Nàng gi, Yudaq byu pê é hkóhkâm nghut lhê lhú?” ga myi jáng, Yesuq gi, “Nàng taí é eq rajung za nghut lhê.” ga tû taí ri.




⁴ Pilat gi, “Shí yuq lé hûn râ mara ngò a myàng.”
ga luî, hkyangjong agyi pé eq shiwa byu pé lé taî
ri.

⁵ Nghut kôlhang, haú bang gi, “Shí yuq gi, Yuda
mau gón má yhang mhoqshit é dông mai,
mingbyû wui é i-myit lé shuî gabyông ri. Haû gi,
Galile mau mai ahkuî shî má jé shoq nghut bê
nghut ri.” ga zuq zuq taî bum akô.




¹³ Haú hkûn, Pilat gi, hkyangjong agyi pé eq zau suwún wuî, mingbyû wuî lé ¹⁴ wut tsîng to mù, “Shí yuq gi, mingbyû wuî lé hkyô shuî nghoq ri ga, Yhang lé nungmoq ngá chyáng shuî lé lô bekô. ahkuî, wú keq, nungmoq é hí má, Yhang lé ngò myî wú le, Yhang má nungmoq hun é mara lé ngò a myàng nghut ri.



18. Yhángmòq bànsheq bang gi, “Shí yùq lé gi, yu pyám aq; Barabaq lé kúm gi, nhang kat byi laq.” ga luí, chôm wut garû bum akô.

19 Barabaq gi, wà htum má gumlau kut é eq byù sat é yánmai, htóng gyó nyî sù nghut ri.



²⁰ Pilat gi, Yesuq lé nhang pyám nau é nghut mù luî, yhángmòq lé dum puq taî ri.

²¹ Nghut kôlhang, yhángmòq gi, “Yhang lé tapzîng má jén tap pyám aq, jén tap pyám aq!” ga luî, wùt taî garû nyi bum akô.



²² Haû mù luî, sum dân nghû râ hkûn, Pilat dum taî é gi, “Haî mù luî lú? Yhang gi, hai mara kut shut bê lú? Yhang má shî gíng é mara lé ngò a myàng, haû mù, ngò, Yhang lé bat, nhuq, mhoqshit luî, nhang pyám râ.” ga luî, yhangmoq lé taî ri.



²³ Yhangmoq gi, Yesuq lé tapzîng má wó jén sat pyám shoq ga, zuq zuq htê mó o mó èq dîng wut nyi akô nghut é yanmai, wó taî ung yù bekô nghut ri.

²⁴ Haûmù luî, Pilat gi, yhangmoq dîng é eq rajung za myit hpyit doqdan byî ri.

A. Ahkyo Azó Lé Hpyê Lhûm É Hkyô

1. Noqkuq htûng sùwún wuì gi, Yhûmsîng Yesuq lé hká shut shuî e akô lhú? Hkâsû é mara hun bum akô lhú?
2. Mau zau Pilat gi, Yhûmsîng Yesuq lé sâng hi hkâsu ga lhom myî ri lhú? Yhûmsîng Yesuq gi, hkâsu ga dum tû taî kat ri lhú?
3. Mau zau Pilat gi, Yhûmsîng Yesuq chyáng mara myang hô nhô ngam ri lùq?
4. Banabaq ga sù gi, hkâsû é byù nghut ri lhú? Ming byû wuì gi, Yhûmsîng Yesuq eq Banabaq lé haî kut râ matú, mau zau Pilat chyáng dúng garû bum akô lhú?
5. Mauzau Pilat gi, haî mù Yhûmsîng Yesuq lé a sat nhâng nau é lhú? Mauzau Pilat gi, Yhûmsîng Yesuq lé hkâsû é dàm byí nau ri lhú?
6. Ló htáng má, mauzau Pilat gi, Yhûmsîng Yesuq lé hkâsu kut râ byùq ri lhú?

B. Ahkyo Azó Lé Sê Gyô É Hkyô

1. Yudaq sêwún wuî gi, yhángmòq é tarâ dông, Yhûmsîng Yesuq lé mara ge hun akô lhú?
2. Mau zau Pilat gi, Yhûmsîng Yesuq chyáng haî mù mara bò nhô a ngam é lhú?
3. Yhûmsîng Yesuq gi, haî mù yhûmsîng gùng yhûmsîng a taî hung yu é lhú?

C. Mhoq Yu é Dông Asàk Dui Râ Hkyô

1. Chyúmlaika lé rago sê é bang (Hparishê pé sê é bang) gi, hkâsu é hkyô shut sê akô lhú?
2. Ahkyo azó shî mai, nàng, Yhûmsîng Yesuq é hkyô haî wó mhoq yu ri lhú?
3. Yhûmsîng Yesuq gi, ngá-nhûng é marâ matú, tapzîng htoq má shî hkám byî é lé, nàng myit má hkâsu hkâm zô ri lhú?

D. Wó Mhoq Yu É Hkyô Pé

1. Yhûmsîng Yesuq gi, haí jung mara le a kut shut kôlhang, nhik dìk shoq mara lé hkam yù bê nghut ri. Yhûmsîng Yesuq gi, ngá-nhûng é marâ matú, shî hkám byi bê ngbut pe yánmai, ngá-nhúng gi, Garai Gasâng eq dàm byi râ mai wó lùt bê nghut lhê.
2. Yhûmsîng wuizat é hkyô, manôn é hkyô eq nghut bûn é hkyô pé gi, rayùq lé nò hkâm nhang é nghut mù, Garai Gasang lé htuqhtîng é mara le nghut nyi ri.
3. Gótû haí jung wó mhoq yu záng ashî lhú? Myi râ dangmyi jòq ashî lhú?


NGHAP MATSÍNG RÂ CHYÚMBUN

Lukaq 23 : 3

Haú hkûn, Pilat gi, Yesuq lé, “Nàng gi, Yudaq byu pê é hkóhkâm nghut lhê lhú?” ga myi jáng, Yesuq gi, “Nàng taí é eq rajung za nghut lhê.” ga tû taí ri.

22. Tapzîng Htoq Má Yesuq Shî hkâm É Hkyô

Jesus Dies on a Cross




Lukaq 23: 26, 32-54

Dang hpóng

Romaq míngdan má gi, kô dik é tarâ lhoq shut é mara byù lé, nhuq bát zingrî yù mù, tapzîng htoq má lhaq sat pyâm akô. Haú su kut jéyáng é hkyô gi, mara kut shut sù a shî shi-má, dik shoq no hpu nhâng râ matú nghut ri. Hau htâng, tarâ shut su é hkyî eq lòq lé tapzîng má dòk tap to mù, tapzîng haú lé, byù myo myo myang é jowò má xuq to to kut akô nghut ri.

Yhûmsîng Yesuq gi, bát htâng myi nyí má, Gatsemani hkyâm mai chyup yu é hui mù, bát htâng ngo nyí nghut jáng shî hkám ra bê nghut ri.



²⁶ Yhángmòq gi, Yesuq lé shuí htoq ló kô é hkûn, yòsô wà mai lo é, Kuruni myuq byû nghut é Simun ga sù lé, chyup yû mù, tapzîng waq nhâng luî, Yesuq htâng má cháng nhang akô.

²⁷ Byù rajùm rayò gi, Yhâng htâng má châng e ló bum akô. Yhâng é yánmai ngaùbyi ngaù nhap eq iyon yôn é myiwe zo wuì le haú má bo tô ri.




³² Haú hkûn, da-myàq í yùq lé le, sat pyám râ ga, Yesuq eq rahá shuî htoq ló akô.


³³ Ahkuî, Ugyap nghu é kong má jé jáng, Yesuq lé tapzîng htoq má jén tap tô é hkûn, da-myàq í yùq lé le, lòqpai lòqyò shut kut luî tapzîng má jén tap tô akô.



³⁴ Haú hkûn, Yesuq gi, “Âwa ê, yhángmòq lé mara hkyut pyám byi laq; hkâsu mù gâ le, yhángmòq kut é hkyô lé yhángmòq a sé kó nghut ri.” ga taî ri. Gyè zô pé gi, Yhâng é mèbu pé lé lháng, hkyîn shosé she é dông gam yu pyám byî akô.



³⁵ Mingbyû wuì gi, yàp to mù tu wú nyi akô. Zau sùwún wuì Yhang lé nyhap é gi, “Yhang gi, byù gó bang lé hkyi yu é sù nghut ri. Yhang gi, Garai Gasang hkyin yu é sù Hkrisduq nghut le gi; Yhânggùng yhang le hkyi yu wú sháng gàq.” gâ akô.



³⁶ Gyèzô pé le, huî ê mù, rhoî nyaú nyaú akô.
Yhángmòq gi, chyîn wing lé, yhun byi kôluî,


³⁷ “Nàng gi, Yudaq byu pê é hkóhkâm nghut é
nghut le gi, Náng gûng yhang nàng, hkyi yu wú
aq.” ga Yhang lé taî akô.

³⁸ Yhâng é ulhum ahtoq má le, (Grik dông le,
Latin dông le, Hebre dông le) “SHÍ YÙQ GI,
YUDAQ BYU PÊ É HKÓHKÂM.” gâ é laiká kâ
tap tô akô.



³⁹ Tapzîng htoq má bàt tap lhâng to huî é da-myàq rayùq gi, “Nàng gi, Hkrisduq nghut lhê, a nghut lhú? Haû Náng gûng nàng le, ngá-nhik lé le, hkyi yù àq.” ga luî, Yhang lé rhoi ri.

⁴⁰ Da-myàq góyùq sù kúm gi, “Nàng le shí yùq eq rajung za jén tô é hui luî nhîng, Garai Gasang lé a gyùq lhú?”



⁴¹ Ngá-nhik gi, yhûmsîng kut shut é mara eq rajung za, jéyáng hui zo gíng é sù nhik nghut lhê; shí yùq kúm gi, hai mara le kut shut wú sù a nghut.” ga luî, haú yùq lé tân kat ri.

⁴² Hau htâng, yhang Yesuq lé taî é gi, “Yesuq ê, Nàng, Náng é mîngdán má jé ló jáng, ngo lé myit bun laq ô.” gâ ri.

⁴³ Haú hkûn, Yesuq gi, “Ngò, nang lé teng za taí lé, hkû-nyí yhang nàng Ngò eq rahá hparadisu má nyi râ nghut lhê.” ga luî, yhang lé tû taî kat ri.



⁴⁴ Haú ahkyíng gi, nyí káng raxe í hkyíng nghut luí, myínhtâng sum hkyíng jé shoq ramau gón mauchut tuq dùt byùq bê nghut ri;

⁴⁵ hkâsu mù gâ le, builoq shum byùq é yánmai nghut ri. Noqkuq yhûm mâ é pán-gyang le, í hkyam byáng dùt byùq bê nghut ri.



⁴⁶ Haú hkûn, Yesuq gi, “Âwa ê, Ngò, Ngá é woi-nyí náng é lòq má àp byî lhê.” ga htê mó èq garû kat ri. Haû su ga ban táí eq Yhang kâng byit bê nghut ri.




⁴⁷ Shô ùp gyèzau hpó gi, haû su dùt é lé myàng jáng, “Shí yùq gi, gè gè yhang, díngrán sù nghut ri.” ga luî, Garai Gasang lé hkya-on kúngtôn ri.



⁴⁸ Haû hkyô lé wú râ ga, lé zîng tô é byù lhúnglhang bang le, haû su dùt é hkyô pé lé myàng kôjáng, myit yón kôluî, wànggàng bàt mù, dum taû lô byùq bekô.

⁴⁹ Nghut kôlhang, Yhang lé sê é bang eq Galile mau mai Yhang htâng châng é myiwe wuì gi, we we má yàp to mù, haû hkyô pé lé byu wú nyi akô.



⁵⁰ Haú hkûn, Yuda mau Aramahti gâ é myuq má, Yosep gâ é sù rayùq nyi ri. Haú yùq gi, nhik bo é sù eq dǐngmán é sù nghut é htoq agó, Garai Gasâng é mǐngdán jé râ hkyô lé myit myòqbyu to sù le, nghut mù luí, ⁵¹ yhang gi, Yudaq uphkâng hpúng mâ é rayùq nghut kôlhang, hpyê lhûm é hkyô má le, zui saí é hkyô má le, myit a bo huí lom é sù nghut ri. ⁵² Yhang gi, Pilat chyáng wàng luí, Yesuq é gùng sôm lé dũng yu ri.



⁵³ Haû mù, gùngsôm haú lé tapzîng mai hkyut hkyô yù luî, pán yúng èq htup yùp mù, ó lé lháng a kat wú shî é, lùqqùk lé kyûng tô é lùqqòk lùp hkaû má kat tô ri.

⁵⁴ Haú nyí gi, Hên Lajang Buínyì nghut luî, Bánno buínyì jé râ za nghut bê.

A. Ahkyo Azó Lé Hpyê Lhûm É Hkyô

1. Romaq gyè zô pé gi, Yhûmsîng Yesuq yhâng tapzîng lé a wó wàq lô é su dùt jáng, ó yùq lé wàq nhang ri lhú?
2. Yhûmsîng é Lòqyò lòqpai hkyam shut ô nhik lé dòk tap tô ri lhú?
3. Yhûmsîng Yesuq gi, Yhang lé shî dàm byi bâng é matú, hkâsu ga kyûdung byî ri lhú?
4. Yhûmsîng Yesuq lé dòk tap lhâng tô é lé, lé wú yàp tô é bang ra-am gi, Yesuq lé hkâsu ga nyhap bum akô lhú?
5. Yhûmsîng Yesuq eq rahá, tapzîng htoq má dòk tap lhâng to huî é da-myàq nhik gi, Yhang lé hkâsu ga taî akô lhú? Yhûmsîng Yesuq gi, da-myàq rayùq lé hkâsu ga tû taî ri lhú?
6. Nyí káng jé jáng, mauhkûng má hkâsu dùt lo ri lhú? Yhûmsîng Yesuq kâng byit é hkûn, Noqkuq yhûm má haî dùt lo ri lhú?
7. Yhûmsîng Yesuq gi, tapzîng htoq má, kâng byit râ wuî má hkâsu ga taî to hkô ri lhú?
8. Yhûmsîng Yesuq kâng byit ló é lé, wú nyi é bang gi, hkâsu ga tû taî bum akô lhú?
9. Pilat chyáng, Yhûmsîng Yesuq é gùngsôm lé ó yùq ê dûng yu ri lhú? Haú gi, hkâsû é byù nghut ri lhú? Haú yùq gi, Yhûmsîng Yesuq é gùngsôm lé hkâ-má ê myhup ri lhú?

B. Ahkyo Azó Lé Sê Gyô É Hkyô

1. Yhûmsîng Yesuq gyè zô pê é matú, kyûdung byî é lé wú mù, nàng haî wó mhoq yu ri lhú? (Yhángmòq é mara lé hkyut pyám byi râ matú, Garai Gasâng lé kyûdung ri.)
2. Yhûmsîng Yesuq gi, yhâng gùng lé tapzîng htoq má shî hkâm râ matú, haî mù àp pyâm ri lhú?
3. Damyàq í nhik gi, Yhûmsîng Yesuq lé, hkâsu byu myang akô lhú? Yhûmsîng Yesuq gi, lòqyo hkyam mâ é damyaq lé, “Ngò, nang lé teng za taí lé, hkû-nyí yhang jáng nàng, Ngò eq rahá Hparadisu má nyi râ nghut lhê.” ga haî mù taí ri lhú?
4. Yhûmsîng Yesuq kâng byit eq Noqkuq yhûm mâ é pán-gyang í hkyam byak gòq byùq é gi, haî lé taí nau é nghut lhê lhú? Ngá-nhûng é matú, hai lichyúm htoq rilhú? (Zoshâng wui lé taí kyo aq.)

C. Mhoq Yu é Đông Asàk Dui Râ Hkyô

1. Shí ahkyo azó má, byu pé lé Yhûmsîng Yesuq chyit é myit lé, hká đông wó myang ri lhú?
2. Ngá-nhûng gi, hkyi yù hkyô hkâsu wó yù râ lhú? (Yesuq yhâng é lòqyo hkyam mâ é damyaq lé tâ taí kat é dang lé wú aq.)
3. Yhûmsîng Yesuq, ngá-nhûng é matú, shî hkám nò hkám byî é jeju lé, ngá-nhûng hká đông dum tân shit râ lhú?

D. Wó Mhoq Yu É Hkyô Pé

1. Yhûmsîng Yesuq gi, Garai Gasâng yhangzo nghut lhê nghû hkyak nàng lùmjîng é nghut jáng, Garai Gasâng chyáng mai mara hkyut san byî é hui luî, hkyi yu é jeju lé myang hkam yù râ nghut lhê. Ngá-nhúng gi, san sêng é yánmai hkyi yù huî é a nghut.
2. Yhûmsîng Yesuq shî hkám nò hkâm é gi, xângzo byu pé, yubàk ngaraî mai wó lùt râ matú nghut ri.
3. Gótû haí jung wó mhoq yu záng ashî lhú? Ahkyo azó shi mai, wó mhoq yu é hkyô jòq lhê lùq? Gótû myi râ dang myi jòq ashî lhú?

NGHAP MATSÍNG RÂ CHYÚMBUN

Lukaq 23 : 34

Haú hkûn, Yesuq gi, “Áwa ê, yhángmòq lé mara hkyut pyám byi laq; hkâsu mù gâ le, yhángmòq kut é hkyô lé yhángmòq a sé kó nghut ri.” ga taî ri. Gyèzô pé gi, Yhâng é mèbu pé lé lháng, hkyîn shosé she é dông gam yu pyám byî akô.

23. Yesuq Dum Dui Toq É Hkyô

Jesus Rises from the Dead




Lukaq 24: 1-12


Dang Hpóng

Yudaq byù myû wui gi, shî bê gùngsôm lé, pán yúng èq htup mù, lùqgòk lé kyûng tô é lùp má myhup akô. Yudaq htûnghking má, shî su é buinùm luzúm wui gi, shi byùq bê su é gùngsôm má, namngón xû bùt byi luî, yhûmsing é chyitdáp hkúngga hkyô tân shit sê akô. Yudaq byù myû wui é lùp gi, kong yâm a nghut jáng, bùm yàm má kyung mù saî tô é yánmai, lùqkyûng eq pung ri. Gùngsôm lé lùqkyûng má kat tô é htâng, lùp hkum má lùq lông èq myhî tô akô.


Yhûmsîng Yesuq gi, bàt htâng ngo nyí myìn má, kâng byit byùq ri. Bàt htâng hkyuq nyí gi, Yudaq byù myû wui é, chyoiyúng bánno bui-nyí nghut é yánmai, haú nyí ó le mú a saí kó nghut ri. Haú mù, sâng-hî nyí nghut é, bàt ra-nyí nyí má, myiwe wui gi, nam ngón xû yu chûng mù, Yesuq é lùp má e wú akô.



¹. Banno buinyi htang napsun noq le, myiwe wui gi, yhangmòq hen tô é namngón jung pé lé yu chûng mù, lùp shut e ló akô.




². Yhángmòq gi, lùp mâ é lùqhkum lêng bóng to lánq é lé, ê myâng kômù, wang e wú kô le, ³. haû Yhumsîng Yesuq é gùng sôm lé, a myàng lo kó nghut ri.



⁴ Yhángmòq maú úng-âng nyi bùm kô é hkûn, radá dâm maulhap su dùqbó é mèbu wùt é byù í yùq, yhángmòq é nàm má yàp tô akô.

⁵ Haû mù, myiwe haú bang gi, gyùq dan bum kôluî, myigùng shut myòqdong ngóm gòp tô bum é u lé, haú nhik gi, “Núngmòq gi, duì sù lé, shi to bâng chyáng haî mù ho nyi akô lhú?”



⁶ Yesuq gi, shí má a nyì lo; Yhang dui toq ló
bê! Yhang gi, núngmòq eq rahá Galile mau má
nyi tô ashî hkûn lé,



⁷ ‘Haû Byu Yhangzo gi, yubàk dáp bâng é lòq má àp pyâm é hui luî, tapzîng má jén sat to huî é htâng, sum nyí nghû é buinyì má lhoq dui toq yu é hui râ nghut lhê.’ ga núngmòq lé taî tô é dang lé myit bun keq.” ga luî, yhángmòq lé taî ri.



⁸ Haú hkûn, yhángmòq gi, Yesuq é dang lé bûn kat bekô nghut ri. ⁹ Yhángmòq gi, lùp mai dum taû lò mù, lagyo raxe rayùq eq gótû lhúnglâng bang lé, haú hkyô bànsheq lo taî kyô akô. ¹⁰ Lagyo pé lé lo taî kyo bang gi, Magadalaq wà mâ é Mariq, Yoanaq, Yakuq é yhângnu Mariq eq, yhángmòq eq rahá nyi é myiwe gó bang le nghut akô.



¹¹ Lagyô pé kúm gi, yhángmòq é dang lé dang sôm su ngam pyám kôluî, a jíng byi kó nghut ri.

¹² Nghut kôlhang, Petruq gi, toq luî lùp má din jé ê mù ngóm wú kat le, màng htup é pán lèq tô é lé za myàng mù luî, haû su dùt é hkyô lé maú é èq, yhûm shut dum taû ló byùq bê nghut ri.

A. Ahkyo Azó Lé Hpyê Lhûm É Hkyô

1. Myiwe wui gi, bàt htoq ra-nyí nàpkyó noq le hká e akô lhú? Yhángmòq gi, haî yu chung akô lhú?
2. Yhángmòq gi, Yesuq é lùp má hká u ê jé akô lhú? Yhángmòq jé e é hkûn, lùphkum haî dut to lánq ri lhú?
3. Myiwe wui gi, lùp hkaû má wang e wú kô le, haî ê myang akô lhú?
4. Haú hkûn, ó yùq htoq lò mù, myiwe wui lé dang lé taî ri lhú?
5. Maumang lagyo gi, Yhûmsîng Yesusq é hkyô eq séng luî, myiwe wui (Magadalaq Mariq nhik) lé, haî taî ri lhú?
6. Myiwe wui gi, Yesuq é lùp mai taû lò luî, ô chyáng e akô lhú? Hau htâng, yhángmòq haî taî akô lhú?
7. Chángzô pé gi, haû myiwe wui taî é dang lé jíng akô lhú?
8. Lùp lé myàng nau é myìt èq din e é chángzo gi, ó yùq nghut ri lhú? Yhang haî ê myang ri lhú?

B. Ahkyo Azó Lé Sê Gyô É Hkyô

1. Myiwe wui gi, lùp má e é hkûn, haî namngón xû yu chung akô lhú?
2. Yhûmsîng Yesuq taî tô é lé dum wó myît bun râ matú, maumang lagyo gi, myiwe myhî nhik lé, haî taî kat ri lhú?
3. Yhûmsîng Yesuq gi, shi é mai, haî mù dum dui toq lo ri lhú?
4. Chángzô pé gi, myiwe myhî nhik taî kyô é dang lé, haî mù a jîng kô é lhú?

C. Mhoq Yu é Đông Asàk Dui Râ Hkyô

1. Yhûmsîng Yesuq dum dui toq lo é hkyô gi, haî mù ngá-nhûng é matú ahkyàk lhê lhú?
2. Ahkyo azó shî má, myiwe wui gi, yhángmòq é chyit myît lé, hká đông tân shit akô lhú?
3. Ahkyo azó shî mai, ngá-nhûng é asàkdui hkyo é matú, haî wó mhoq hkam yu ri lhú?

D. Wó Mhoq Yu É Hkyô Pé

1. Yhûmsîng Yesuq gi, yhâng é chángzô pé lé tái tô é eq rajung za, shi é mai dum dui toq lò bê nghut ri.
2. Yhûmsîng Yesuq gi, shi é dông mai, tsádán lé wó ung pyâm é hpungwup atsam bo ri.
3. Ahkyo azó shî mai, Yhûmsîng Yesuq, ngá-nhúng lé ahtum abyùq é asàk byi sù nghut é hkyô eq ra-nyí má, ngá-nhúng bànshoq bang, yhang eq rahá myang nyì râ nghut é hkyô lé, san za wó mhoq yu ri.
4. Gótû hái jung wó mhoq yu záng ashî lhú? Myi râ dangmyi jòq ashî lhú?

NGHAP MATSÍNG RÂ CHYÚMBUN

Lukaq 24: 6

Shî má a nyì lo; Yhang dui toq ló bê!

24. Ema-u Gà é Wà Shut E É Hkyô

Jesus Walks the Road to Emmaus



Lukaq 24 : 13-35

Dang Hpóng

Dang myi: Nàng gyai nhik nge wú é lùq? Haû gi, haî mù lú?

Dangké: Nàng myit tô é dông a dùt lo é hkûn.

Haû bàt htoq hkyuq nyí nyí má nàng gi, Yhûmsîng Yesuq é chángzo rayùq yùq nghut tô le hkâsu hkâm zo râ lú? Shingrán wú aq. Nàng gi, Yhûmsîng Yesuq lé, hkyi yù Yhûmsîng Mesai-a dông myit lum to râ nghut lhê. Haî mù gâ le, nàng gi, Yhûmsîng Yesuq nò hpyo lhoq gê byî é hkyô lé le, nàt gang hkat htoq byî é hkyô lé le sé gû, myàng gû nghut ri. Náng é yhûm yò lé tô pyâm to mù, Yhâng htâng cháng berâ nghut lhê. Yhang gi, dànloq tung, shi byùq ri. Chángzo raxe rayùq gi, gyùq mù haq nyi wún akô. Lùp má le haî a jòq lo. Yhûmsîng Yesuq gi, Yhang shi é mai dum dui toq lò râ ga taî tô é lé, byu pé gi, tô myhî pyâm akô nghut ri.

Ahkyo azó shî má, chángzo í yùq gi, Yhûmsîng Yesuq shi é htâng, Yudaq yubân nyí má, myit gyai tiq gyai yón luî Yerusalem wà mó mai htoq ló akô. Yhûmsîng Yesuq gi, Yhang taî tô é dang têng é hkyô lé yhángmòq chyáng, hká dông sàksé tân shit é hkyô lé, wú wú sháng.



¹³ Haû ra-nyí má za, Yesuq é chángzô pé mâ é í yùq gi, Yerusalem wà mó mai nyhit déng kô wê é Ema-u gâ é wà shut e ló akô.


¹⁴ Yhángnhik gi, dùt laî ló é hkyô pé bànshoq lé, rayùq eq rayùq taî lhûm nyi akô.




¹⁵Yhángnhik gi, haú hkyô pé lé rayùq eq rayùq taí hpyê lhûm e ló kô le, Yesuq gi, yhángnhik chyáng jé lé lô mù, yhángnhik eq rahá sô nyi ri. ¹⁶ Nghut kôlhang, yhángnhik gi, myòq hpuq hpuq pyám byî é hui kômù, Yhang lé a sê wú byùq kó nghut ri. ¹⁷ Haú hkûn, Yesuq gi, yhángnhik lé, “Núngnhik hkyô so uchyang taí lhûm lé lo é gi, haí jung wá nghut akô lhú?” ga myî kat jáng, yhángnhik gi, myòqdong shûm kut luî, hkyîng yàp tô akô.



¹⁸ Yhángnhik mâ é Hklupa gâ é sù gi, “Nàng gi, Yerusalem wà mó má lé bíng nyî luî nhîng, shí gyoro lé haû wà má dùt lo é hkyô pé lé, a sê é bíng gi, Nàng baú za wá nghut lhê lhú?” ga myî kat ri.




¹⁹ Yhang gi, “Haî jung lhú?” ga dum myî é hkûn lé, yhángnhik gi, “Nazaret wà byù Yesuq é hkyô nghut lhê; haú yùq gi, Garai Gasâng é hí má le, byù lhúnglhâng bâng é hí má le, nhut shô hpàq chyî a-tsam eq hkyî loq a-tsam má wum-o bo é sù myìqhtoi nghut ri.



²⁰ Nghut kôlhang, hkyangjong agyi pé eq ngámòq é zau sôwún wui èq haú yùq lé sat pyám râ matú àp byî pyám kômù, yhángmòq gi, Yhang lé tapzîng má jén sat pyám bekô nghut ri.

²¹ Ngámòq kúm gi, haú yùq lé, Israelaq byù myû lé hkyi yù râ sô nghut lhê nghû luî, myít myòqbyu nyi bum lhê. Nghut kôlhang, haú su dùt laî ló é gi, hkû-nyí sum nyí lháng bò bê.



²² Hau htoq agó, hkû-nàp noq le, lùp má ê wú é, ngámòq hpúng mâ é myiwe wuì ra-am gi, ngámòq lé, lo lhoq maú akô.

²³ Yhángmòq gi, Yesuq é gùngsôm lé a myàng jáng dum taû lò mù, ‘Haû Yhûmsîng dui nyi ri.’ ga luî, taî kyô é maumang lagyo htoq shit é shing-rán lé, myang é hkyô lé, lo taî kyô akô.

²⁴ Haû mù, ngámòq é luzúm wuì ra-am gi, lùp má ê wú kô le, myiwe wuì taî é eq rajung za, dùt to lánq é lé ê myang akô. Nghut kôlhang, haú yùq lé gi, yhángmòq a myàng kó gâ.” ga luî, Yhang lé taî kyô akô.



²⁵ Haú hkûn, Yhang gi, “Myiqhtoî pé taî é dang bànshoq lé lùmjîng râ matú, hpàqchyî a bo é eq ngha é sù nhik ê,

²⁶ Hkrisduq gi, haú su é wuîhke jamjau hkâm zô yu é htâng má shèq, Yhâng é hpungwup shingkang má wó wang nyi to râ, a nghut kó lhú?” ga luî, yhángnhik lé myî ri.




²⁷ Yhang gi, yhángnhik lé, Mosheq kê tô é eq myìqhtôî pé bànsheq bang kê tô é Chyúmdang pé mai, Yhang má âng é dang bànsheq é lichyúm lé, taî hpông kyô ri.



²⁸ Ahkuî, yhángmòq, haú nhik e ló é wà má chyang lò kôjáng, Yesuq gi, laî ló râ su kut ri.

²⁹ Haú hkûn, yhángnhik gi, “Ngá-nhik eq rahá wang bíng sháng; hkâsu mù gâ le, buì gyùm bê mù, mau le chut lô bê nghut ri.” ga luî, Yhang lé wum kat chôm lung nyi akô. Haú mù luî, Yesuq gi, yhángnhik eq rahá wang bíng bê nghut ri.



³⁰ Yesuq gi, zang zo râ ga, yhángnhik eq rahá zung tô é hkûn, mùk lé yù luî, jeju hkya-on mù, myhik hpé luî, yhángnhik lé gàm byî ri.

³¹ Haú hkûn, yhángnhik é myòq bóng lô luî, Yesuq nghut é lé bûn sé kat bekô. Yesuq kúm gi, yhángnhik chyáng mai byùq byùq bê nghut ri.



³² Haû mù, yhángnhik gi, “Yhang gi, hkyô má ngá-nhik eq dang nyo lhûm é eq Chyúmdang é lichyúm taî hpóng shit é hkûn, ngá-nhik gi, i-myít ûnghkaû má, achyí aku dùt bê a nghut lhú?” ga luî, yhángnhik yhang chang taî lhûm akô.

³³ Yhángnhik gi, toq mù, radá dâm Yerusalem wà mó shut dum taû lô kô le,



lagyo raxe rayùq eq, yhángmòq eq rahá nyi é bang zùp míng to kô é lé ló myang akô.

³⁴ Haú bang gi, “Haú Yhûmsîng gi, teng za yhang dum dui toq ló bê; Simun lé lháng htoq shit bê nghut ri.” ga taî lhûm nyi bum akô.

³⁵ Haú hkûn, yhángnhik gi, hkyô má dùt laî ló é hkyô pé eq mùk hpê é hkûn má Yesuq lé bûn sê kat é hkyô lé, taî kyô akô nghut ri.

A. Ahkyo Azó Lé Hpyê Lhûm É Hkyô

1. Ema-u wà shut e é hkyô má, byù í yùq gi, haí eq séng luí taí lhûm sô tô akô lhú?
2. Hkyô má, yhángnhik htâng châng lé lô sù gi, ó nghut ri lhú? Yhûmsîng Yesuq gi, yhángnhik lé haí myî ri lhú?
3. Hkalupa gi, Yhûmsîng Yesuq myî é dang myi lé hkâsu ga tô taí ri lhú? Yhángnhik gi, Yhûmsîng Yesuq lé hkâsu dum tô taí akô lhú?
4. Yhûmsîng Yesuq gi, Mosheq kê tô é eq myìqhtoî pé bàshoq bang kê tô é Chyúmdang pé mai, yháng-nhik lé, hkâsu ga taí hpông kyô ri lhú?
5. Yhángnhik eq rahá nyi to sù gi, Yhûmsîng Yesuq nghut é hkyô lé, hkâ-nhám shèq sê akô lhú?
6. Yhûmsîng Yesuq gi, rahkyô htáng, yhángnhik lé Chyúmlaikâ é lichyúm taí kyô é hkûn, yhángnhik gi, myìt má hkâsu ga hkâm zô akô lhú?
8. Yhûmsîng Yesuq byùq ló é htâng, Hkalupa eq yhâng é luzúm hpó gi, hká shut e ló akô lhú? Yhángnhik gi, chángzô pé lé haí taí kyô akô lhú?

B. A Hkyo Azó Lé Sê Gyô É Hkyô

1. Hkalupa eq yhâng luzúm nhik Yerusalem wà mó shut htoq e ló hkûn, hkâm zô é hkyô lé nàng, hkâsu byu myang ri lhú?
2. Yhûmsîng Yesuq gi, Yhang ó nghut é hkyô lé a sé nhâng shi má, chyúmlaiká lé hí haî mù mhoq byî ri lhú?
3. Yhûmsîng Yesuq gi, haî mù yhángmòq lé Chyúmlaiká mâ é, Mesai-a é hkyô mhoq byî ri lhú?
4. Yhángnhik gi, Yhûmsîng Yesuq chyúmdang mhoq byî é hkûn, yhángnhik é i-myit ûng hkaû má, haî mù “achyí aku ” dùt akô lhú?

C. Mhoq Yu é Đông Asàk Dui Râ Hkyô

1. Radàm dàm, ngá-nhúng gi, Garai Gasâng é mungdang lé gyô nyi kôlhang, haî mù a dât gyo dùt sê lhê lhú?
2. Ngá-nhúng Hkristan pé gi, wuîhke jamjau hkâ-í huî nyi kôlhang lháng, haî mù myit myòq byù hkyô wó lhê lhú?
3. Ahkyo azó shî mai, náng é asàk dui hkyô má châng kut e ló râ rajung jung myang mhoq yu ri lhú?

D. Wó Mhoq Yu É Hkyô Pé

1. Yhûmsîng Yesuq, ó yùq nghut é lé, ngá-nhúng hkyak yhang wó sé râ matú, ngá-nhúng lé Garai Gasâng é mungdâng èq myìthkum hpóng byi râ nghut lhê.
2. Yhûmsîng Yesuq gi, asàk dui nyi é Garai Gasang nghut lhê. Yhang lé lùmjîng é bang bànshoq gi, Yhâng chyáng myòqbyù jang jòq lhê.
3. Gótû hái jung wó mhoq yu záng ashî lhú? Myi râ dangmyi jòq ashî lhú?

NGHAP MATSÍNG RÂ CHYÚMBUN

Lukaq 24 : 26

Hkrisduq gi, haû su é wuîhke jamjau hkâm zô yu é htâng má shèq, Yhâng é hpungwup shing kang má wó wang nyi to râ, a nghut kó lhú?” ga luî, yhángnhik lé myî ri.

25. Yesuq Mauhkông Shut Shuî Toq Yû Huî É Hkyô


Jesus Ascends to Heaven



Lukaq 24: 36 -53

Dang Hpóng

Mhô-myi ahkyo azó shî má, Yhûmsîng Yesuq gi, myidàm htoq má, Yhâng é chángzô pé eq rahá nyi é jîhtum nghut bê hkyô lé myàng râ nghut lhê. Yhûmsîng Yesuq gi, shi é jang mai dum dui toq lò mù, bui-nyì myixê nyí Yhâng chángzô pé eq rahá nyi é hkyô lé Lagyo laiká má kê tô ri. Yhûmsîng Yesuq gi, Yhang, gè gè yhang dum dui toq lô bê nghut é hkyô lé a lum shut kó râ matú, Chángzô pé bànshoq bang lé hkâsu ga pying to hkô é hkyô lé wú wú sháng.



³⁶ Yhángmòq haú hkyô lé chôm taî nyi tô bum ashî lé, Yesuq gi, Yhâng gûng yhang, yháng-mòq é agùng má yàp to luí, “Núngmòq nguìngón yùqyo nyi sháng gàq.” ga luí, yhángmòq lé taî ri.


³⁷ Yhángmòq kúm gi, gyùq dan byùq bùm kô-mù, sobyô lé myàng bê ga myit yu pyâm bum akô.

³⁸ Haû mù luí, Yhang gi, “Núngmòq gi, haî mù dan nyi bum akô lhú? Haî mù núngmòq é i-myit ûnghkaû má úng-âng nyi bum akô lhú?



³⁹ Ngá é lòq eq Ngá é hkyî lé wú wú keq. Ngò yhang nghut nyi lhê. Ngo lé sop wú keq. Sobyô nghû é gi, ngo lé núngmòq myang é su, sho eq showui showang bo é a nghut.” ga luî, yhángmòq lé taî kyô ri.

⁴⁰ Yhang gi, haû su ga taí mù, Yhâng é hkyî loq lé tân shit ri.



⁴¹ Yhángmòq gi, gabú é eq maú nyi bùm kômù, a wó jíng shi dùt tô é hkûn lé, Yesuq gi, “Núngmòq shí má zô hpo rajung jung wó akô lhú?” ga luî, yhángmòq lé myi kat ri.

⁴² Haú hkûn, yhángmòq gi, nyhîn nyhoq tô é ngozo rahtung lé, byî akô.

⁴³ Yhang gi, haû lé yù mù, yhángmòq é hí má zô shit ri.



⁴⁴ Hau htâng, Yhang, yhángmòq lé taî é gi, “Mosheq é tarâ eq, myìqhtoi laiká pé má le, Hkya-on Kungtôn Laiká pé má le, Ngò eq séng luî kê to má kê to bànshoq gi, dìk râ chyat nghut lhê nghû luî, núngmòq eq rahá nyi tô ashî hkûn lé, Ngò, núngmòq lé taî kyô tô é pé gi, shî nghut bê.” ga taî ri.




⁴⁵ Hau htâng, Yhang gi, Chyúmdang pé lé sê gyo shoq ga, yhángmòq é i-myít hkum hpóng byí ri.

⁴⁶ Haû mù, Yhang gi, “Hkrisdùq gi, wuîhke jamjau hui zo mù, sum nyí nghû râ buinyì má, shi é mai dum dui toq lô râ hkyô lé le,



⁴⁷ Yerusalem wà mó mai hî luî, byù myû chângjup lé, Yhâng é myìng lé lang luî yubàk mara hkyut pyám byi râ hkyô eq myit lhîng râ hkyô lé le, hko kyo râ hkyô lé, kê to bê nghut ri.

⁴⁸ Núngmòq gi, shí pê é sàksé pé nghut nyi akô.



⁴⁹ Ngá Wa byî tô é danggidiq lé, Ngò, nungmoq é ahtoq má nhang kat râ nghut lhê; nungmoq kúm gi, htoq tsáng myhâng mâ é wum-o a-tsam wó yu é buinyì jé shoq, Yerusalem wà mó má láng nyî keq.” ga luî, yhángmòq lé taî ri.

⁵⁰ Hau htâng, Yhang gi, yhangmoq lé Behtani wà yàm shut shuî htoq ê mù, Yhâng é lòq tu toq luî, shimân byî ri.



⁵¹ Haû su kut shi-mân byî nyi ashî le, Yhang gi, yhángmòq chyáng mai gâng ló byùq luî, mauhkûng shut shuî toq yu é hui bê nghut ri.



⁵² Yhángmòq kúm gi, Yhang lé noqkuq kômù luî, gyai gabú é myit èq Yerusalem wà mó shut dum taû ló akô.

⁵³ Yhángmòq gi, noqkuq yhûm má nyi to mù, Garai Gasang lé hkya-on kúngtôn nyi bum akô nghut ri.

A. Ahkyo Azó Lé Hpyê Lhûm É Hkyô

1. Yhûmsîng Yesuq gi, Chángzô pé lé sâng-hi haî taî ri lhú?
2. Chángzô pé gi, Yhûmsîng Yesuq lé myang é hkûn hkâsu ga hkâm zô bum akô lhú?
3. Yhûmsîng Yesuq gi, Yhang, sobyô a nghut é hkyô lé, rago za wó sé kô râ matú, chángzô pé lé haî kut nhang ri lhú?
4. Yhûmsîng Yesuq gi, Chyúmdâng é lichyúm lé sê gyo kô sháng gàq ga, chángzô pé é i-myit nhiklhum hkum hpóng byî ri. Haû jáng shèq, yhángmòq gi, kô dik é Garai Gasâng múzó lé wó wûn wàq korâ nghut lhê. Yhûmsîng Yesuq gi, yhángmòq lé haî kut nhâng nau nyi ri lhú?
5. Yhûmsîng Yesuq gi, chángzô pé lé, Yerusalem wà mó má haî mù láng tô ri lhú?
6. Yhûmsîng Yesuq gi, chángzô pé lé, yhûmhkaû má huî é htâng, yhángmòq lé hkâ-má shuî e ri lhú?
7. Yhûmsîng Yesuq gi, chángzô pé lé Shi-mân byî nyi hkûn, haî dùt byùq ri lhú?
8. Yhûmsîng Yesuq mauhkûng htoq shuî toq yû huî é htâng má, chángzô pé gi, haî kut akô lhú?

B. Ahkyo Azó Lé Sê Gyô É Hkyô

1. Yhûmsîng Yesuq gi, chángzô pé eq huî é hkûn yhang "Núngmòq nguìngón nyì sháng gàq" ga, haì mù taì ri l hú?
2. Yhûmsîng Yesuq gi, Yhang sobyô a nghut é hkyô lé, haì mù Yhâng chángzô pé lé, rago sé nhâng nau ri l hú?
3. Yhûmsîng Yesuq gi, Yhâng é chángzô pé lé, hai sàksé dùt nhâng nau ri l hú?
4. Yhûmsîng Yesuq gi, Garai Gasâng é myìng lé lang mù, hai danggidìq byî to hkô ri l hú?
5. Yhûmsîng Yesuq gi, chángzô pé é ahtoq má Chyoiyúng woínyí gyó jé râ matú, haì mù yhángmòq lé láng nhang ri l hú?
6. Chángzô pé gi, Yerusalem wà mó má, dum taû lò kô é hkûn, haì mù, myìt ngón myìt ngui èq taû lo bum akô l hú?

C. Mhoq Yu é Đông Asàk Dui Râ Hkyô

1. Ngui ngón hkyô lé hkâsu wó kut yù râ l hú?
2. Ngá-nhúng gi, Yhûmsîng Yesuq lé, a myang wú, a záng zuî wú é nghut kôlhang, Yhûmsîng Yesuq asàk dui nyì l hê nghû haì mù lùmjìng l hê l hú?
3. Ngá-nhúng le, Yhûmsîng Yesuq é sàksé gùng wó dùt shoq, hkâsu kut râ l hú?

D. Wó Mhoq Yu É Hkyô Pé

1. Yhûmsîng Yesuq gi, Yhang gè gè dum dui toq bê hkyô ngá-nhúng bànshoq bang lé, hkyak lùmjîng râ lé ô nau nyi ri.
2. Garai Gasang gi, chyúmlaika mâ é mungdang lé ngá-nhúng rago wó sé râ matú, ngá-nhûng é i-myit hkum hpóng byî lhê.
3. Ngá-nhúng bànshoq bang gi, Yhûmsîng Yesuq é chángzô pé nghut mù, Yhûmsîng Yesuq kut laî lo é hkyô a sé shî é bang lé wó taî kyô lhê.
4. Gótû haí jung wó mhoq yu záng ashî lhú? Myi râ dangmyi jòq ashî lhú?

NGHAP MATSÍNG RÂ CHYÚMBUN

Lukaq 24 : 36

Yhángmòq haú hkyô lé chôm taî nyi tô bum ashî le, Yesuq gi, Yhang gûng yhang, yhángmòq é agùng má yàp to luî, “Núngmòq nguìngón yùqyò nyi sháng gàq.” ga luî, yhángmòq lé taî ri.

